

COLUMNA

Jau e mias glistas

SANDRA BALZER/FMR

Venderdi damaun: in quadrin plus l'in u l'auter chavazzin – è già è formulà mes emprim pensum per oz. Ed uschia cuntinuesch jau: «responder il mail dad Aron Moser», «emplenir il formular da spesas», «scriver l'artitgel da Mirko Baselgia», «termin cun Kim Osinga», «studegiar las statisticas da la populaziun»... ed uschia s'emplenescha mes bloc da notizias per dapli che la mesadad.

Jau era adina in fan da las «glistas da to do», ni per bun rumantsch «glistas da far». Però il pli tard s'enter avair entschet a lavurar sco redactura tar la FMR èn ellas ina part integrala dal mes mintgadi.

Mia flaichezza per las glistas ins pudess tgunsch definir sco dependenza. Mussament è mes cudesch da notizias privat – ina seria da glistas èn da chattar lien. Puncts fitg differents, «bels patrats e bunas ideas» sco ch'i para sch'ins dat ina sfegliada. Emprim confess per oz: vairamain exequi hai jau strusch ina terza. Igl èn chaussas che jau n'hai atgnamain ni gust ni schlantsch da far. Tgi nettegia gugent fanestras u la frestgera? Cun excepziun da mia mam-

Jau era adina in fan da las «glistas da to do» – ni per bun rumantsch las «glistas da far».



FOTO SANDRA BALZER

ma che vegn schizunt da libra voluntad a gidar nettegiar mias fanestras n'encunusch jau betg olma. E puncts sco «nettegiar il velo» u «far la duscha» n'hai jau strusch ina giada nudà sin ina da las numerusas glistas. Pertge? Cun ponderar e studegiar suonda mes segund confess: tut quellas glistas ch'existan già dapi onns eran ed èn plitost per la schletta conscienza. Forsa in fenomen psicologic, quai na sai jau betg. Però d'ina chaussa sun jau segira: mo già da nudar tut ils singuls puncts ma dat in tschert sentiment d'almain avair fatg ina part da la lavur, forsia be ina mieula, ma tuttina – er sche las fanestras èn anc adina tuttina malnettas sco avant in mez onn.

Tge che pertutga mia lavur tar la FMR ha la glista in'otra muntada. Ella ma gida vairamain d'avair la survista per la lavur autonoma sco schurnalista. Ed uschia sai jau dir per oz – e quai cun buna conscienza: «Responder il mail dad Aron Moser» – fatg. «Emplenir il formular da spesas» – fatg. «Scriver l'artitgel da Mirko Baselgia» – fatg. «Termin cun Kim Osinga» – fatg. E quai che pertutga «studegiar las statisticas da la populaziun», quai vegn ad esser l'emprim punct per la glista da glindesdi. Ma pir s'enter la fin d'emna.